

## Kristo Kaka Yangu Mkubwa

Hivyo ilimpasa kufananishwa na ndugu zake katika mambo yote, apate kuwa kuhani mkuu mwenye rehema, mwaminifu katika mambo ya Mungu, ili afanye suluhu kwa dhambi za watu wake—**Waebrania 2:17.**

Kaka Mkubwa wa jamii yetu ameketi katika kiti cha enzi cha milele. Anamwangukia kila mtu anayegeuza uso wake kumwelekea Yeye kama Mwokozi. Anajua kwa uzoefu udhaifu wa kibinadamu, yaliyo matakwa yetu na pale ilipo nguvu ya majaribu yetu.... Anakuangukia wewe, mwana wa Mungu mwenye mashaka. Unajaribiwa? Atakuokoa. Umedhoofika? Atakuimarisha. Je! Wewe ni mbumbumbu? Atakuelimisha. Je! Umejeruhiwa? Atakuponya. Bwana, “Huihesabu idadi ya nyota”; na bado “Huwaponya waliopondeka moyo, Na kuziganga jeraha zao.”

Yakiwapo mahangaiko yako na majaribu yako, yaweke mambo yako yote mbele za Bwana. Roho yako itaimarishwa kwa uvumilivu. Njia itafunguliwa wazi kwako kwa ajili yako kujinasua kutoka kwenye kila aibu na magumu. Kadiri unavyojijua kuwa u dhaifu na bila msaada zaidi, ndivyo unavyozidi kuwa na nguvu katika uweza Wake. Kadiri mizigo yako inavyozidi kuwa mizito, ndivyo unavyopata pumziko zaidi katika kuiweka juu ya Mbeba Mzigo wako.

Matatizo yanaweza kuwatenganisha marafiki; maji yasiyotulia ya bahari pana yanaweza kuleta msukosuko kati yetu na wao. Lakina hakuna mazingira, wala umbali ambao unaweza kututenga mbali na Mwokozi. Popote pale tutakapokuwa, Yeye yuko mkono wetu wa kuume, ili kututegemeza, kutudumisha, kutushikilia na kutufariji. Mkuu kuliko upendo wa mama kwa mtoto wake ni upendo wa Kristo kwa watu Wake waliokombolewa. Ni fursa yetu kupumzika katika upendo Wake; tukisema, “Nitamtumaini; kwa kuwa alitoa uhai Wake kwa ajili yangu.”

Kile kinachodhaniwa kuwa upendo wa mwanadamu kinaweza kubadilika, lakini upendo wa Yesu haujui kubadilika. Pale tunapomlilia kwa ajili ya msaada, mkono Wake umefunguliwa wazi ili kutuokoa.

Anatamani tutambue kwamba amerudi mbinguni kama Kaka yetu Mkubwa na kwamba uweza usio kipimo aliopewa Yeye tuna haki ya kuwa nao.